



TEMA : POLITEKNIK MERLIMAU MELAKA

Perkara : TVET

TAJUK ARTIKEL : PAU26: KULN CADANG GLOBAL TVET TALENT NETWORK HUBUNG BAKAT MALAYSIA DI LUAR NEGARA

SUMBER : BERNAMA - 11 SEPTEMBER 2026

PAU26: KULN Cadang Global TVET Talent Network Hubung Bakat Malaysia Di Luar Negara

🕒 11/09/2026 08:25 PM



KUALA LUMPUR, 11 Sept (Bernama) -- Kelab UMNO Luar Negara (KULN) mencadangkan penubuhan Global TVET Talent Network sebagai platform menghubungkan bakat Malaysia di seluruh dunia bagi membolehkan kepakaran mereka terus dimanfaatkan untuk pembangunan negara.

Perwakilan KULN United Kingdom Muhammad Amir Ikram Mohd Fadil berkata jaringan itu penting bagi menyediakan ruang kepada rakyat Malaysia yang bekerja dan menimba pengalaman di luar negara untuk terus menyumbang kepakaran kepada tanah air.

Beliau berkata negara kini mempunyai ramai bakat berkemahiran tinggi dalam bidang kejuruteraan, teknologi, kecerdasan buatan (AI) dan profesional yang berada di luar negara, justeru mekanisme perlu diwujudkan bagi memastikan kepakaran mereka turut dimanfaatkan untuk pembangunan tanah air.



TEMA : POLITEKNIK MERLIMAU MELAKA

Perkara : TVET

TAJUK ARTIKEL : PAU26: KULN CADANG GLOBAL TVET TALENT NETWORK HUBUNG BAKAT MALAYSIA DI LUAR NEGARA

SUMBER : BERNAMA - 11 SEPTEMBER 2026

"Dalam usaha menjadikan Malaysia sebagai *skills nation*, kita mesti menangani cabaran kehilangan bakat negara. Jangan sampai kita melahirkan bakat, sedangkan negara lain yang menikmati kepakaran mereka," katanya ketika membahaskan usul pada Perhimpunan Agung UMNO 2026 (PAU26), di sini hari ini.

Menurut beliau, penghijrahan bakat tidak seharusnya dilihat sebagai sesuatu yang perlu ditakuti, sebaliknya peluang dan laluan perlu diwujudkan bagi membolehkan mereka terus menyumbang kepada tanah air meskipun berada di luar negara.

"Daripada *brain drain*, kita mesti bergerak kepada *brain gain* dan *brain circulation*, bakat Malaysia mendunia tetapi tetap menyumbang kepada negara," katanya.

Sementara itu, Muhammad Amir Ikram berkata komuniti rakyat Malaysia di luar negara juga perlu diperkasakan dari aspek kesiapsiagaan menghadapi kecemasan, khususnya dalam mendepani ketidaktentuan geopolitik, bencana alam, gangguan penērbangan dan bekalan makanan.

Sehubungan itu, beliau mencadangkan KULN diperkasakan sebagai *Community Emergency Response* yang berperanan menjadi penghubung antara perwakilan Malaysia dengan komuniti rakyat negara ini di luar negara ketika berlaku kecemasan.

"Kita bukan mengambil alih tugas kedutaan, tetapi menjadi penghubung antara kedutaan dengan komuniti di lapangan. Apabila berlaku apa-apa kecemasan, kita cepat mengenal pasti siapa perlukan bantuan, yang ada anak kecil dan yang terputus bekalan makanan," katanya.

Muhammad Amir Ikram berkata jumlah rakyat Malaysia di luar negara menunjukkan keperluan mewujudkan jaringan komuniti yang lebih kukuh, dengan Australia sahaja menempatkan lebih 19,000 pelajar Malaysia, diikuti United Kingdom lebih 12,000 dan Mesir hampir 7,000.

-- BERNAMA